

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 422283 22 St
Tuzla, 31.10.2023. godine

OPĆINSKI SUD U TUZLI, stečajni sudija Vedran Milašinović, u stečajnom postupku nad imovinom društva „PRIMATEH“ d.o.o. Gradačac, za proizvodnju i trgovinu, ul. Sarajevska bb, nakon provedenog stečajnog postupka donio je dana 31.10.2023. godine slijedeće

RJEŠENJE

ZAKLJUČUJE SE stečajni postupak nad imovinom dužnika „PRIMATEH“ d.o.o. Gradačac, za proizvodnju i trgovinu, ul. Sarajevska bb, u stečaju, matični registarski broj 32-01-0269-10, JIB: 4209987250004.

Rješenje će se objaviti na Oglasnoj tabli suda, WEB stranici suda, Službenim novinama FBiH, te dostaviti FIA.

Pravne posljedice zaključenja stečajnog postupka nastupiće po proteku osam dana od dana objavljivanja rješenja u „Službenim novinama FBiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem broj: 32 0 St 422283 22 St od dana 14.07.2022. godine otvoren je stečajni postupak nad imovinom dužnika „PRIMATEH“ d.o.o. Gradačac, za proizvodnju i trgovinu, ul. Sarajevska bb.

Tokom postupka su ispitane sve prijave potraživanja, te su povjericima priznata potraživanja u ukupnom iznosu od 314.485,40 KM. U viši isplatni red su svrstana potraživanja u ukupnom iznosu od 79.743,97 KM, u opšti isplatni red u iznosu od 223.468,61 KM, a u niži isplatni red u iznosu od 11.272,82 KM.

Unovčenjem stečajne mase u ovom postupku je ostvaren iznos od 57.783,00 KM, od čega je prodajom pokretne imovine ostvaren iznos od 25.075,00 KM, a naplatom potraživanja od trećih lica (kupaca) iznos od 32.708,00 KM.

Stečajni upravnik je dostavio prijedlog završne diobe dana 19.06.2023. godine, u kojem se navodi da unovčena stečajna masa iznosi 57.783,00 KM, da preostala sredstva za završnu diobu nakon isplate svih troškova postupka i rezervisanja sredstava za završne aktivnosti (koje su pojedinačno navedene u izjašnjenju stečajnog upravnika datom na skupštini povjericilaca održanoj dana 06.07.2023. godine) iznose 38.600,00 KM, a koji troškovi su finansirani iz preostalog depozita za vođenje postupka i iz stečajne mase, pa s obzirom da priznata potraživanja povjericilaca višeg isplatnog reda ukupno iznose 79.743,97 KM, to bi se navedeni iznos od 38.600,00 KM trebao isplatiti povjericima višeg isplatnog reda radi njihovog djelimičnog namirenja u procentu od 48,405%, tako da bi Poreznoj upravi (priznato potraživanje višeg isplatnog reda od 78.866,97 KM) bilo potrebno isplatiti 38.175,50 KM, a Nedžadu Musiću (priznato potraživanje višeg isplatnog reda od 877,00 KM) iznos od 424,50 KM. Ostatak sredstava je predviđen za pokriće troškova stečajnog postupka, ukupni troškovi postupka za period 14.07.2022-30.06.2023. godine su iznosili 32.850,00 KM, te su rezervisana sredstava u iznosu od 4.719,00 KM na troškove koji su bliže označeni na skupštini povjericilaca.

Nakon provođenja svih radnji predviđenih odredbama stečajnog zakona, sud je rješenjem od 09.10.2023. godine dao saglasnost na prijedlog završne diobe podnesen od strane stečajnog upravnika dana 19.06.2023. godine, uz napomenu da je i na skupštini povjericilaca održanoj dana 06.07.2023.

godine donesena odluka kojom se usvaja prijedlog stečajnog upravnika da se izvrši isplata troškova stečajnog postupka, izvrši dioba povjeriocima prema prijedlogu i o tome obavijesti povjerioce, sačini završni račun i dostavi sudu, te zaključi stečajni postupak.

Dana 13.10.2023. godine stečajni upravitelj je obavijestio sud i dostavio dokaze da je izvršio diobu u skladu sa prijedlogom završne diobe na koji je sud dao saglasnost.

Slijedom svega navedenog, a temeljem odredaba člana 190 stavovi 1 i 2 Zakona o stečaju, sud je donio odluku kao u stavu I dispozitiva ovog rješenja, uz napomenu da je skupština povjerilaca dana 06.10.2022. godine donijela odluku da se ne provodi revizija s obzirom na manju vrijednost imovine koja čini stečajnu masu i jasno finansijsko poslovanje kako se ne bi stvarali dodatni troškovi, a pri kojoj odluci je ostala i na skupštini povjerilaca održanoj dana 06.07.2023. godine.

Nadalje, temeljem odredbe člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama FBiH te dostaviti FIA, dok je odredbom člana 204 stav 2 istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

STEČAJNI SUDIJA
Vedran Milašinović

Pouka o pravnom lijeku:

Protiv ovog rješenja je dozvoljeno izjaviti žalbu Kantonalnom sudu u Tuzli, koja se podnosi putem Općinskog suda u Tuzli, najkasnije u roku od osam dana počev od isteka petog radnog dana od dana objavljivanja rješenja u Sl. novinama FBiH.